

四庫全書

史部

欽定四庫全書

王端毅奏議卷三

明 王恕 撰

巡撫雲南

處置邊務奏狀

節該欽奉勅諭命臣巡撫雲南地方仍禁約接連交阻等處地界官吏軍民不許私通商旅往來交易除欽遵通行外近訪得交趾着頭目換易服飾裝作客商潛入臨安等處地面聽探消息又訪得三五年前一江西

人王姓者曾到雲南要冒籍報名科舉所司不容隨後  
其人奔往交趾受彼偽御史職事為之運籌畫策提兵  
巡邊且彼不特此一人而已亦有偽總兵等官往來巡  
守又聞交人以蓮花灘為市專一收買雲南販去生銅  
鑄造短鎗曩者跟隨太監錢能京衛指揮郭景齋勅道  
由雲南而往遂使交人有假道赴京之舉然此雖由郭  
景誘致實乃彼之欲為今又聞交趾走回軍人說稱在  
前交趾吞了占城之時就要乘勢來犯天朝雲南地方

觀此數事則交人奸謀詭計不言可知明者睹未萌況已著耶今臨安府密邇交趾本處雖設一衛實在官軍除屯種守哨等項差撥外見操止有二百餘人通計雲南二十五衛所實在官軍除屯種守哨等項差撥外見操不及一萬三千人每處見操官軍多者不過七八百人其他諸夷雜處該徵稅糧數少且又不通舟楫官軍糧餉止靠屯田供給別無來處見今所在食糧不穀一年支用况兼頻年以來災荒不收今歲尤甚軍民憔悴

日不聊生盜賊在在生發動輒劫掠殺人東備西出殆  
無寧日加之以廣西廣南元江麗江羅雄等處土官連  
年讎殺不聽撫化再加之以開辦銀課索取進貢等項  
地方騷擾人心失寧況臨安雖委指揮一員在彼守備  
名位不重難以節制衛所金齒雖有副總兵都督同知  
沐瓚在彼止可鎮守金齒騰衝二處控制外夷地方亦  
不能兼制臨安又照得迤東曲靖六涼等處迤西洱海  
大理等處在前俱有守備都指揮專一提督操練禁防

盜賊其後一向缺官操守及照都司止有都指揮僉事  
方明掌管印信兼理馬政周佐協同管事兼管操吳瑤  
操備近又為事問發帶俸差操王倫奉勅提督屯種亦  
已病故俱各缺人替補然事機之殷盜賊之多兵力之  
寡財用之乏征科之繁軍民之困守職之缺如此又况  
臣才識凡庸年力衰憊恪守憲綱固所當勉經畧邊務  
實非所長萬一交人跳梁寇兵北向難稱為手足之疾  
未免貽宵旰之憂除行都布按三司分巡分守官禁約

接連交趾等處地界官吏軍民不許私通商旅交易銅鐵等物及提督各處官軍時常操練慎固封守嚴加隄備及將前項都指揮員缺會同鎮守巡按等官推舉相應人貲另行奏請定奪外伏望聖明憐憫地方特勅該部計議合無將雲南都司所轄衛所除金齒騰衝二邊衛官不動外其餘二十二衛所見操官軍於內量調四千員名分兩班令其輪流前去臨安協同本處官軍舍餘在彼操守半年一換上班之日照例給與行糧下班

住支仍添設才識老成副使一員專一在彼整飭兵備  
公同守備官操習人馬振揚威武一以防腹裏之盜賊  
一以備外夷之侵侮及將雲南安寧黑白鹽井等鹽課  
提舉司成化四年五年六年七年八年存積鹽課就於  
本布政司召商開中十萬餘引每引令其納足色白銀  
六錢於本司官庫收貯以備糴買軍餉不許權豪勢要  
之家占中侵奪民利剝削龜戶仍將開辦銀課及進貢  
寶石等項暫且停止仍簡命年力精強才兼文武大臣



一員代臣巡撫其地將臣放歸田里以終餘年如此則任用得人武備不期修而自修軍民安業盜賊不期息而自息矣緣係處置邊務事理未敢擅便具奏謹題

奏解犯人及叅鎮守官奏狀

准兵部咨內開安南走回軍丁楊四說稱舊年三月內見有朝廷差指揮等三十餘人到安南地方送與交趾王馬二匹細狗二隻弓一張箭一綑干礮地方軍機重情合當查究但不曾指實是何指揮姓名合無行巡撫

雲南左副都御史王恕會同雲南巡按監察御史查勘  
是何衛分指揮帶領三十餘人前去安南有何公幹緣  
何饋送國王馬匹弓箭等物要見的確明白一名名行  
提到官取問如律情輕者就彼先行照例發落內指揮  
與情重者枷釘差人押送赴京再問另行奏請定奪奏  
准移咨前來行據雲南都布按三司呈查得有原跟欽  
差鎮守雲南太監錢能名下金吾左衛指揮使郭景齋  
捧勅書前來雲南帶領人伴戎達等往安南國開諭當

將戎達等行提到官監候查得郭景先該太監差往干崖等處公幹未回委據雲南按察司僉事方進呈稱前到金齒司提獲本犯懼罪投井身死將跟隨人伴時瑛等并求索夷方寶石等件強奪伯夷人口罕擺等解報到院臣會同巡按雲南監察御史甄希賢問得犯人戎達招係雲南都司廣南衛右所百戶陳宗原總旗錢聚下小旗成化十年八月內有達跟隨鎮守雲南太監錢能名下金吾左衛已故指揮郭景公差到京蒙差本官

齋捧勅諭前去交趾有本官明知廣西是出使交趾路  
道不合枉道回至雲南就在太監衙內住坐有錢太監  
與達并今在官小旗劉全孫千戶家人孫得兒完千戶  
家人羅順兒已故總旗李俊說稱差你每跟郭景往交  
趾去你可作急收拾衣鞋達等不合依聽本月二十一  
日早郭景令人叫領人夫從衙內擡出黑木櫃六箇竹  
籠三箇又牽出白點子大馬一匹火食菓品一担并弓  
箭腰刀等件在外達等跟隨本官當日起身衙內又差

百戶蔣雄亦不合依聽護送前去本月二十三日通  
海驛歇郭景不合挾勢索要火千戶虎鯨細狗一隻又  
叫前所久慣下番已故軍人史義跟隨同行二十五日  
到臨安衛歇郭景又索要本衛指揮華鐸驢馬一匹  
清沙馬一匹銀十兩軍人葉周白花細狗一隻又令本  
衛差今在官總旗任能張永小旗潘原未到官千戶葉  
春百戶鄒斌總旗陳名王瑄小旗李貴帶領軍人鄭忠  
等四十四名各不合依聽各帶器械護送又帶今在官

華鐸家人華通識字軍人孟達并伊家人孟海餘丁王  
成未到官總旗鄒鑑小旗詹鉞軍餘李景各不合跟隨  
前去又差建水州失記名民人段麻子先去交阻界上  
報信二十八日臨安起身二十九日到蒙自縣土官祿剛  
家安歇又將伊家牛一隻宰殺喫用本年十二月初四  
日到交阻地界清水河曠野去處搭蓋窩鋪安歇本月  
二十五日交阻差頭目人帶領官軍不知其數到蠻來  
寨駐劄二十六日差通事帶三四十人到清水河往來

答話三日至三十日有船二十隻來接有蔣雄葉春鄒斌帶領旗軍任能等并孟海回還達同李俊劉全孫得兒羅順兒華通鄒鑑詹鉞孟達王成李景史義各亦不合越度邊關跟隨郭景上船過河到蠻來驛安歇有交趾頭目來見就令官軍將館驛圍住成化十一年正月初四日上船行一日又到亦不知名館驛安歇仍令官軍將館驛圍住初五日行半日過蓮花灘灘下有船二百餘隻每船有軍十餘人亦有吹鼓手達等每人坐一

船就裝載原帶行李馬匹等件又行數程失記日期到  
歸化衛又有大船數隻來接二十日到紫蓮州交陞王  
先在彼下營接待江中又有大小船三四百隻郭景見  
王在彼輒將勅諭置於船內輕身先去拜見王見郭景  
先来拜見因說我身上不安免拜本日王回城郭景同  
達等仍在船內歇次日又行三十餘里王又在岸上立  
迎郭景即奉勅諭上岸置於龍亭王先回郭景隨勅諭  
進王城官軍將達等圍送天使館安歇郭景見王畢亦



到館內二十二日王遣官送下程二十二日郭景於前  
項木櫃內取出紅寶石頂子青紵絲瓦隴帽一頂金廂  
起花玉帶一條金廂寶石綠環二付一付紅寶石心一  
付青寶石心各色寶石十包約一升有餘大紅紵絲綠  
綉蟒龍衣服二件各色上樣紵絲二十足中樣紵絲十  
足各色上樣羅二十足各色上樣紗二十足中樣紗十  
足白三梭布五十足洗白夏布三十足真色夏布三十  
足紅氍子五足皂鹿皮靴十五雙氈襪十五雙竹籠內

取出減金事件馬鞍轡一付減銀事件馬鞍轡二付并  
隨身帶去銀結束腰刀二把撒帶一付弓一張箭一綑  
馬三匹細狗二隻進與交趾王二十四日交趾王差人  
送卓面酒飯到天使館宴郭景有頭目二十餘人來陪  
宴畢郭景却詣王國行五拜三叩頭禮謝恩二十五日  
王回送郭景銀五十兩扇一百十把茹南香三塊與達  
等跟隨人伴每人銀一兩達等自到天使館官軍日夜  
防守不得自在交趾王說要整理方物差頭目同郭景

等從兩廣路赴京進貢郭景怕去兩廣無由脫身却設計與交趾王詐說我又齎駕帖來雲南討禽鳥藥材這幾箇伴當都是黔國公差來送我的也要交還他若是進貢就同我從雲南去赴京比兩廣路又近便沿途都有驛站人夫馬匹又無大海風波之險交趾王依聽收拾方物差陪臣何宣陳瑾帶領軍馬一千餘名隨同郭景雲南入貢因而窺瞰我中國虛實行至蓮花灘有郭景又詐與何宣等說我先去蒙自去整理人夫馬匹前

來迎接郭景同達等脫身連夜走回報知蒙自縣當有  
千戶段忠同土官舍人帶領土兵人等前去阻當有何  
宣等已到本縣管轄判村駐劄有段忠等到彼把住道  
路不容何宣等前進又差人報知太監總兵差指揮馬  
玄等亦到判村守把何宣并本國節次移文堅執要從  
雲南經過以致沿邊一帶及腹裏寧州通海等處軍民  
聞知驚疑皆欲流徙躲避其後太監總兵并三司差官  
齎文前去再三撫諭何宣等方纔回還郭景等前項情

罪一向不曾事發本年十一月初八日遇蒙赦宥成化十二年十二月內為地方事錢太監又差郭景黔國公差千戶龔遂會同金齒副總兵委官指揮侯勇前去千崖宣撫司地方公幹有郭景帶領今在官家人時英伴當劉祥屠名趙福未到官軍人楊海不合依聽越度邊關於成化十三年正月十一日到千崖宣撫司郭景不合索要宣撫怕開法馬二匹銀三十兩頭目罕歪小厮一口名喚刺泥本月十二日到南甸宣撫司又索要宣

撫舍人刁落過金廟寶石帽頂子一箇本月十六日到  
蠻莫又索要頭目刁孟扛銀一百五十兩小女一口名  
喚阿你馬二匹本月二十四日勘事了畢龔遂侯勇回  
還郭景又要去各處外夷地方求索財物仍領時英等  
於本年二月初一日到孟密有頭目曩罕弄并男思賓  
不出本月二十日郭景到寶井見得本井已故頭目混  
鑿即混你今在官第三妾喚名罕擺係曩罕弄孫女生  
有姿色使令楊海等探知本婦出外挑水強搶到窩鋪

內姦宿一夜一向在鋪姦占不放本年閏二月初一日  
曩罕弄使人請郭景回至孟密郭景索要曩罕弄銀二  
百兩就將原求索前項銀兩收買寶石并曩罕弄餽送  
寶石共二十二斤零八兩六錢又買象牙二十四斤檀  
香一十六斤寶石屑二百二十三斤又索要失記名夷  
人碧玉絛環一付碧玉包指事件二付碧玉甜瓜四箇  
金盞一箇重四錢銀廂撐子一十八箇銀廂碗四箇緬  
胎兒鬼見愁共一十三斤虎牙二箇伯夷銀一百零二

兩趙福亦取買寶石五兩收拾行李起身曩罕弄要將罕擺留住不容郭景帶回郭景言說若你不與我帶去不許你在這地方住食若與我去我討冠帶與你管事曩罕弄意圖冠帶管事只得依從郭景隨帶罕擺一路姦宿本月失記日期到隴川宣撫司郭景將玉帶二條送與宣撫失記名舍人本舍回奉伯夷銀一包郭景嫌少不受到芒市長官司郭景將青拱線織金尾撒一件青紵絲圓領一件白紵絲直身一件大紅羅尾撒一件



葱白羅直身一件大紅紗織金蟒龍尾撒一件送與在前拜認為男百夫長放斌接受放斌銀壺二把銀罐一箇本年三月十七日到潞江安撫司郭景將黑籠一箇內有錦褥一床鞞鞋一雙枕頭一箇并黃驕馬一匹寄在千戶尹宣家本月十九日回到金齒歇息本月二十一日夜有巡撫雲南王都御史劄委僉事方進亦到金齒挨提郭景次日方僉事設法邀請郭景到司與伊說稱有一人在巡撫處告你着我来取你回去郭景回說

交趾事務先已有人報我知道干我何事都是錢公收  
拾異樣物件差我去我是聽使之人敢不依從等語方  
僉事當令指揮胡亮將郭景行李擡赴分司月臺上眼  
同副總兵沐都督并金齒大小官員盤驗將完副總兵  
回去方僉事當將郭景鎖杻發仰鎮撫俞銓令人防守  
在傍有俞銓不合不行嚴謹止令已問發軍人李祐看  
守亦不合將郭景引放廂房內却去上後以致郭景投  
在本司井內身死令人撈出身屍委官相視明白浮丘

在彼將時英等并原占婦女二口小廝一口馬四匹同點揀見數寶石等物通解到院惟恐郭景身屍不明牌仰金齒司將屍擡至雲南西門外委官覆相明白責令屍親領埋訖取問罪犯外結得郭景雖帶官軍蔣雄等六十六員名內蔣雄等五十四員名到於安南界上先回止有戎達等十二名跟隨前去並無三十餘人到安南國達等每人受銀一兩在路花費無存郭景委因懼罪自行投井身死別無他故招結是實十七名劉全孫

得兒羅順兒華通孟達王成時英劉祥屠名趙福任能  
張永潘源孟海罕擺刺泥阿你供招與我達招結內相  
同議得我達劉全孫得兒羅順兒華通孟達王成俱合  
依越度緣邊關塞因而出外境者律絞秋後處決時英  
劉祥屠名趙福俱除不應輕罪外依越度緣邊關塞者  
律各杖一百徒三年任能張永潘源孟海俱依不應得  
為而為之事理重者律各杖八十時英等俱有大誥減  
等時英劉祥屠名趙福各杖九十徒二年半俱審有力

照例納米完日任能張永潘源孟海各杖七十與戎達等七名俱犯在革前免科同供明罕擺刺泥阿你各着役隨住內戎達劉全孫得兒羅順兒華通孟達王成俱係跟隨郭景私出外境情重人犯除將罕擺等案發雲南都司羈候時英等先行摘發戎達等牢固枷釘及寶石等物印封完固案發雲南按察司差撥官軍押解都察院再問另行奏請定奪外查得先據雲南按察司揭帖該本邦軍民宣慰使罕落法緬書告稟洪武永樂洪

熙宣德正統天順年間並不聽見京官指揮到來夷方  
先有盧京官蘇京官楊京官前來不到我宣慰處却往  
孟密曩罕弄思賓處說稱要開衙門得金銀寶石他思  
賓曩罕弄起兵來殺宣撫多歪悶男多活法死了又來  
將我應襲男罕糯法殺死了其有差發拜見拖欠只因  
京官指揮人等前往思賓刁孟扛道路去訖被刁孟扛  
將我百姓殺了今有思賓反我地方係是洪武永樂年  
間設立衙門降與金牌信符着辦差發等因已呈總兵

官黔國公沐琮等委官撫勘外開報知會伏覩金牌信符衙門節該欽奉勅諭倘大小官員貪婪無籍用強擾害全家治以死罪欽此今招郭景到於孟密等處索要銀兩寶石強奪婦女及稱我討冠帶與你管事等情可見本邦前項緬書所言之事不誣查得盧京官即盧安蘇京官即蘇本俱指揮楊京官即楊能係百戶俱係跟隨太監錢能頭目參照太監錢能以帷幄腹心之臣而陰結外國之君誣上行私不義孰甚况郭景奉使無狀

擅起邊釁及與盧安蘇本楊能等故違前例遞年前去  
夷方索要金銀寶石人口馬匹等物許開衙門以致曩  
罕弄等背叛本管宣慰奪其地而殺其人流毒遠方構  
怨外夷雖則各犯之所為實乃錢能之主使合將錢能  
盧安蘇本楊能等拏送法司明正其罪以為後世事君  
而有二心及生事邊陲擾害夷方者之戒再照鎮撫俞  
銓不行用心關防以致犯人投井自盡亦合拏問及照  
罕擺刺泥阿你俱係郭景强奪强取伯夷人口欲便差



人伴送彼處給親完聚使夷人知朝廷法令之公柔遠之仁且以潛消其怨怒不平之氣而陰折其劫奪無上之心緣錢能係內臣盧安蘇本楊能俞銓俱係軍職罕擺等係外夷人口未敢擅便今將起解過犯人并寶石等件開坐具本

計開犯人七名 戎達 劉全 孫得兒 羅順兒

華通 孟達 王成

計開寶石等件 青紅寶石二十四斤零一十三

兩六錢 寶石屑二百二十斤 碧玉包指事件二  
付 碧玉絛環一付 碧玉甜瓜四箇 金廂寶石帽  
頂子一箇 金盞一箇重四錢 銀廂櫟一十八箇  
銀廂碗四箇 銀壺二把共重三十四兩 銀罐一箇  
重十兩 伯夷銀一百零二兩 緬茄兒鬼見愁共一  
十三斤 象牙二十四斤 檀香一十六斤 虎牙二  
箇

叅鎮守官跟隨人員擾害夷方奏狀

據灣甸州印信緬書譯該告稟照得洪武年間將灣甸州衙門給與金牌誥命勘合底簿一年該辦差發銀一百五十兩逐年上納並不曾拖欠正統四年麓川思任發造反攻殺各處地方蒙欽差總督軍務兵部尚書王驥總兵等官調領本軍前來征勦反人了當又給榜文與各地方張掛撫安夷民耕種安業辦糧當差至成化九年有吳京官前來本州住一十五日得銀二百兩我每將二年差發送與他回還了成化十年有京官江和

送鎮康州知州刁孟憂回還住本州經過後住二十日  
取要銀兩我每又將拜見進貢銀五百兩送與纔回又  
將本州做莊子令認納銀二百兩至成化十二年正月  
十五日有鐵京官前來送賞賜段子二疋銀一百二十  
兩本年三月有京官福安到本州催要方物拜見取母  
子象二隻并打壺瓶臺盞銀三百五十兩打發盤纏銀  
一百五十兩前往孟定去訖又一百兩於四月內京官  
江和差通事袁鑑到州撫諭陶孟人等出至金齒住半

箇月送段四足要銀四百六十兩比時有錢公公上金齒有本處伴當廉隸得銀一百五十兩一次有京官江和又送段一段要我每借他銀一百五十兩本州不曾揭借有錢五到金齒送段子三足得銀一百兩至十二月十九日京官江和前去鎮康往州路過住了七日又要了三百兩成化十三年二月十六日京官楊能差人送段二足不曾回奉他物因此拖欠差發拜見今本州知州景拙法病故伊男長成不曾做官有把事已故通

事年老亦無冠帶火頭百姓承應擡扛不得安業俱各  
逃往別處去了將田地拋荒拖欠差發罪責我每不便  
有下程牛豬雞酒米糧不計其數因此呈緬書告稟知  
道可憐見我奴婢不要着他京官每來我臨近地方恐  
怕不成衙門告稟可憐見給請漢夷榜文前來張掛使  
火頭百姓纔得耕種田地辦納差發有金齒俞鎮撫與  
江京官做弟兄因送段子得我每銀六十兩告稟着令  
還我奴婢方便等因到院臣仰惟我太祖高皇帝統馭

天下慮恐大小官員軍民人等假托公差為名前往外夷衙門生事擾害需索財物致生邊患故降勅諭金牌信符及勘合底簿關防詐偽以盡撫綏之道列聖相承率由舊章每於踐阼之初換與勘合底簿勅諭昭昭篇首立法甚嚴是以臣民遵守不敢違犯夷人得以安生莫不慕義向化恪脩職貢頃自太監錢能到於雲南海慢自賢罔遵聖訓不時差人前去外夷衙門假公營私需索攪擾失夷人心職貢因之以缺今灣甸州告稱前

項京官節次要伊銀兩等情臣再三體訪委的是實然  
此輩之到雲南非特攪擾外夷衙門而腹裏地方無不  
被害人情大為之不堪除給榜文發去該州禁約及已  
故知州景拙法伊男承襲之事另行外查得吳京官即  
吳源係散官江和即姜和係指揮鐵京官即鐵聰係勇  
士福安即劉安與楊能俱百戶係跟隨錢能人員錢五  
係錢能義男合無差官將各犯拏解到京查金牌信符  
衙門勅諭事例治以重罪就將追出贓物給該州出銀



人收領如此則法令昭明而奸頑知所警懼恩信不失而遠人自然悅服緣數內姜和等係軍職未敢擅便具題

乞嚴賞罰以禁盜賊奏狀

照得衛所官軍本為防奸禦侮緝捕盜賊征討不庭而設非徒費軍實張虛聲而為觀美也且雲南地方諸種蠻夷雜處其人兇悍好殺不以盜賊為恥盔甲鎗刀弓箭挨牌等項軍器家家有之動輒三五十人或一二百

人結為羣黨各執軍器流劫村寨抄搶家財殺死人命  
或截路搶劫商旅貨物畧無忌憚各處雖有哨堡巡司  
及巡捕官軍非惟賊衆軍寡不能抵敵亦由馭之無法  
所以不能成功何也伏覩大明律失悞軍事及主將不  
固守條內別無與賊對敵殺傷官軍罪坐管軍頭目之  
人況勝負兵家之常雖智如良平勇如信布亦不能保  
其必勝奈何近來庸懦不才頭目因向時領軍將校或  
以輕進被叅或以損軍得罪以此遇賊先以退縮保軍

為心畧無向前勦賊之志幸而稍得其利輒便虛增首級妄報功次以圖陞賞不幸而折損官軍就行隱匿不聞設辭遮掩以避其罪况進則有死而無功退則有生而無罪如此為將校者誰肯提軍出戰為士卒者誰肯奮不顧身此官軍遇賊所以不能成功者然也設若臨陣奮勇與賊對敵而死者厚恤其家不罪領軍之官若能成功厚加賞賚其臨陣退縮不能奮勇致死致賊猖獗殺害良民失陷地方照依軍法處治設或鼓之再戰

誰敢退縮誰不向前此馭之之法也如此則賊不期破而自破功不必成而自成矣且雲南強賊比之他處數加十倍雖曰習俗之使然其致之也則有由焉或土官令家奴糾合部民而為之或管莊之人招引無籍軍而為之盜以土官并管莊之人為主人贓俱藏於其家誰敢前去搜捕此雲南強盜所以多於他處也况雲南去京萬里非可以朝發而夕至若將問成該決強盜照依常例奏請至秋後然後行刑動經監候一年以上或二

三年者亦有之比及奏請至日或死於獄中而不受刑者多矣將何以警兇惡而快人心如蒙乞勅該部計議合無今後官軍人等與賊對敵而死者官給銀物以恤其家本管頭目督軍同戰救援不及者不罪如或有功次量加賞賚若遇賊退縮不能奮勇不能督戰及見同征軍士被圍故不救援者俱以軍法處治土官并管莊之人縱賊為非者亦治以重罪仍將今後挈獲并見問未結強盜都布按三司會問明白同見監已問結強盜

俱引赴鎮守總兵巡撫巡按等官處會審無冤委官押發市曹就便處決仍將首級發於打劫地方梟掛示衆然後具奏如此則賞罰當而官軍知所勸法令嚴而盜賊不敢肆矣緣係明賞罰以禁盜賊事理未敢擅便具本具題

陞右都御史謝恩疏

臣去歲伏蒙聖恩以南京戶部左侍郎改都察院左副都御史巡撫雲南今年六月初十日欽奉勅諭陞本院

右都御史仍前巡撫伏念臣居萬里炎荒之地荷九重寵擢之恩品秩有加職司仍舊捧黃麻而感激持白簡以汗顏奸貪滿目慚無擊搏之能愁歎盈途愧乏撫綏之術寇盜未盡屏息蠻夷尚爾跳梁言論不暇及乎家志慮時常在於國忠誠徒切功業未成既蒙信任而無疑敢不捐生以圖報除望闕謝恩外謹具奏聞

乞却鎮守官進貢禽鳥奏狀

據雲南都布按三司呈抄蒙欽差鎮守雲南御用監太

監錢能案驗據雲南按察司呈承奉欽差巡撫雲南都  
察院左副都御史王劉付成化十三年六月初八日未  
時有雲南中衛後所千戶段忠手擡黃袱苦蓋一物由  
本院中路而進本職恐是勅書急走前去迎接揭起黃  
袱看視却是黃鳥一隻有指揮熊誌等說稱這是黃鸚  
哥公公使我們送來着大人進貢本職回說進貢事與  
我無干當令各官將鸚哥擡回外今思本院並無奉到  
進貢黃鸚哥明文雖已令各官擡回誠恐鎮守太監錢



能有奉到旨意公文尋得前項鸚哥著令本職進貢本職不知不行收接進貢有失敬上之禮日後累罪不便擬合行查為此劄仰本司即便轉行鎮守太監錢能處查勘前項鸚哥產自何方從何而得奉何旨意公文行取令本職進貢或令鎮守太監錢能自行進貢惟復鎮守太監錢能尋得前項珍奇之物自要進貢於例有無違礙明白回報施行奉此理合具呈乞為明示施行得此照得當職成化四年三月十六日皇上勅命前來鎮

守雲南聖旨面諭彼處產有各樣禽鳥尋取進來欽此  
除欽遵外續後又奉御用監太監錢義傳奉旨意分付  
進貢禽鳥百戶福安等除將各色禽鳥進貢五次成化  
十一年二月十七日金齒司民人楊華報稱孟密寶井  
有寶石一塊重一斤黃鸚哥一架陸象牙一隻成化十  
二年十一月二十日據雲南布按二司呈為地方事該  
千崖宣撫司土官宣撫怕開法緬書譯告有反人刁孟  
扛等聚衆孟密人馬殺占地方搶擄象馬百姓等情緣

係邊務地方事理會同總兵官黔國公沐琮案仰三司轉行分巡分守官員及委指揮郭景千戶龔遂前去撫勘當職自備銀兩段足順差指揮郭景尋買前項寶石鸚哥去後郭景到於金齒呈稱寶石俱已尋得及黃鸚哥一架具數開報續據雲南按察司呈為外夷脫回中華軍丁事提取郭景僉事方進在於金齒計令郭景投井身死將寶石等件抄封解送巡撫左副都御史王處驗封并犯人戎達差鎮撫劉韶等解赴都察院轉達遺

有黃鸚哥在於金齒司本司差健步軍人楊恕送到看得黃鸚哥寶石俱係郭景尋買事干一連隨差指揮熊誌千戶段忠送赴巡撫左副都御史王處轉進却稱熊誌段忠由本院中路而進但係朝廷所用之物各處進貢皆由御道而進此禮不妨及查有無奉到旨意公文行取尋得前項珍奇之物自要進貢等情中間誠有不容當職在邊鎮守合仰雲南都布按三司抄捧回司轉行巡撫左副都御史王煩請早為定奪作急奏聞當職

詐傳聖旨將年例所貢之物盡行革去將當職發遣施行都司轉呈總兵官黔國公沐琮知會蒙此理合備呈施行等因到院案照先因鎮守太監錢能令熊誌等送黃鸚哥前來蓋以黃袱不露其形臣初不知為何物已而乃言令臣進貢臣亦不知主何意因思去年內閣大學士商輅等奏准却貢獻之事今後不許進貢奇花異卉珍禽異獸珍珠寶石金銀器物今却令臣進貢黃鸚哥誠恐近日又有奉到勅旨臣是以轉行本官處查理

別無不容本官在邊鎮守之意今來文之言如此臣欲  
不與之辨誠恐本官故為此言將以中臣雖朝廷明見  
萬里必不為其所惑然下情戰慄豈能自己故臣不得  
不昧死言之且本官之在雲南遞年假以地方為名差  
京官盧安蘇本江和楊能福安鐵聰吳源等前去外夷  
孟密等處求索金銀寶石擾害夷人所得之物以十分  
為率錢能與盧安楊能等先剋落八九分止有一二分  
進上郭景此去收買寶石等項銀兩多是取諸夷人錢

能聞知拏郭景恐怕郭景到官說出真情就差人齎帖子及令人寫簡帖報知郭景得方便處自討分曉因此郭景投井身死臣前項文移止是行查有無奉到進貢黃鸚哥旨意公文今却平空造此浮浪之言其意亦可槩見臣再思向者學士商輅等所言却貢獻無非為蒼生為社稷計也陛下慨然准其所奏者亦無非為蒼生為社稷計也上下同心朝野稱慶夫何詔旨已頒行於天下而錢能不為意公然以進貢為名差人前去夷方

索要寶石禽鳥等件方命擾人莫此為甚臣聞昔漢之時鼠巢於樹野鵲變色識者以為不祥夫鸚哥本綠羽而今黃其羽豈非所謂野鵲變色之類不知錢能何取於此遣人遠涉徼外擾害取之將以進獻不知朝廷何少乎此亦不知朝廷無此何所損有此何所益乎然而此物有無既不足為朝廷損益抑不知錢能何忍故違目前詔旨而必欲進乎萬一朝廷納之何以使天下臣民之無疑乎是乃因小以失大也其可乎哉臣愚以為



此物誠不宜受况雲南數年以來盜賊竊發地方不寧  
若禽鳥若金燈籠寶石屏風等項之貢絡繹不絕行居  
騷然近來少息人心稍寧若又容進此物而不却則希  
寵徼幸者將必過求奇巧以進之豈止前數事而已其  
弊蓋有不可勝言者臣又聞不寶遠物則遠人格遠人  
不服則脩文德以來之即今外夷久缺朝貢之禮交人  
漸有不服之心此正朝廷及內外臣鄰無怠無荒之日  
豈宜設耳目之玩忽不虞之戒伏望陛下念祖宗創業

之艱難今日守成之不易明降詔旨痛却錢能此貢仍  
通行各處守備鎮守內外官員今後除常例歲貢外其  
餘一應花草禽鳥寶石玩好物件一切禁止不許貢獻  
願陛下留心聖學專意政事永為華夷之主天下幸甚  
生民幸甚臣因錢能之言而冒昧及此臣誠不識時務  
不知忌諱罪該萬死伏惟陛下恕其狂瞽而察其心為  
此具題

駕帖不可無印信疏

臣荷蒙聖恩叨掌風紀材朽學淺不諳事體近聞雲南  
中衛百戶汪清來自京師齎捧駕帖與刑部郎中鐘蕃  
錦衣衛百戶宋鑑臣竊有疑焉伏見五府六部都察院  
行移天下諸司公文及給批差官前去各處公幹或提  
取犯人俱於所在官司比號相同然後行事又聞駕帖  
下各衙門則用司禮監印信該科掛號皇城各門俱打  
照出關防印子皆所以防詐偽也今聞齎來駕帖既無  
該監印信該科字號又無各門關防此臣之不能無疑

者一也近該臣等題為外夷脫回中華軍丁事都察院覆本奏奉聖旨是各差的當官去務要勘問明白干礙錢能奏來處置欽此今原差郎中等官鐘蕃等齎領前項旨意公文於本年九月初六日到雲南提取犯人盧安等到官鞫問間百戶汪清又齎駕帖於本月十一日到送與郎中鐘蕃等此臣之不能無疑者二也然臣之所疑者無他但為事體之不一何則事體一則人皆尊信而無疑事體不一非惟起人之疑且使投間抵隙者

得以行其詐而濟其私設若駕帖內有賜死重事而無印信可驗其人將死乎將不死乎果出於上意而不死則是違君命而罪愈重若非上意而死之未免含冤於地下由是言之駕帖之出誠不可無印信臣以疏遠孤踪劾奏炙手可熱之權要何啻履虎狼之尾撩虺蛇之首真可謂不知量者也但緣前項事情非臣私家之事干係地方之安危生民之休戚國體之輕重人心之向背且如昔者交趾守鎮非人因而失陷地方騰衝一夫

啓釁以致釐賊反叛費無限之錢糧傷無限之生靈至今無老少言之莫不疾首蹙額酸鼻流涕今日錢能等所為之事殆有甚焉將來之禍誠不可測朝廷縱無按問之文部屬縱無訴告之詞臣巡撫其地風聞其事亦當為陛下言之况交通外國之事兵部奏准行臣與御史甄希賢會問攪擾夷方之事木邦等處節有緬書告訴臣是以不得不從實上聞其罪彼與否朝廷自有祖宗法度在臣豈敢容私意於其間哉若臣不以實告則

是黨權要而欺朝廷也其罪將安逃乎縱使幸而免之亦豈忠臣孝子之心之忍為乎且忠孝乃臣子之節臣若以不忠不孝存心朝廷將安用臣臣將何以報陛下哉况居其位則思死其官乃臣之分也黨權要而苟利祿臣則不忍為也有此情悃干冒天威不勝戰悚待罪之至

叅提奪占南甸田地軍職奏狀

據南甸宣撫司印信緬書該護印土官百夫長刀惱藥

同知劉暹通把事人等譯告欽差鎮守巡撫雲南都御史知道據矣顯百克蠻呈文到本司稱說普天下衙門地方皆是天皇帝掌管永樂十二年開設南甸州有孟底一處矣賴一處孟決一處羅卜思莊一處作水甸一處斬細一處大蒲窩一處共七處地方屬我南甸州朋辦差發拜見應付站赤到今似我矣賴地方父祖百夫長刀羨丙在日並不曾將田土賣與別人一段天順四年有八那濃換田地胡叅將來管食時將撒藥一寨官



塞一寨撥與刁孟玉作馬料

闕

田後胡叅將病故有他

管莊楊四將田地三寨盜賣與尹指揮了有錢衙占了  
邦盪一寨緣多弄一寨線多乃一寨有騰衝陳指揮占  
了邦勞一寨稱線一寨路那一寨磨隴一寨有明指揮  
占了克茹一寨蠻養一寨被尹千戶占了田二段因此  
百姓逃移差發不敷我將田一處當在蕭榮名下後將  
銀贖取並不肯還田寨把事謝政占田一段知事謝慶  
占了一寨皆是辦納差發拜見應當站赤的地方俱被

占去一二十年了並不肯替當站應付人夫馬匹我矣  
額百姓盡去逃了拖欠差發拜見有誤站赤人馬供給  
罪責不便將情呈知本司得此轉呈印信緬書告稟乞  
請明文着令親齎前來本司收照着令他每將村寨田  
地退還我每照舊辦納差發當站便是等因到院審得  
刁克蠻供稱錢太監占了邦盪等處田地委金齒鮑千  
戶管又被騰衝蘭千戶盜報起科等臣竊惟外夷之人  
性如犬羊馭之以道則歸順馭之失策則背叛故祖宗

時因其慕義向化臣伏中國是以待之以誠信撫之以恩義嘗降勅禁止官員軍民人等不許假托公差前去夷方擾害非徒安外夷實所以安中國也若外夷安則邊方無事而中國自安外夷不安則邊方多事而中國亦不得安今外夷南甸宣撫司百夫長刁克蠻告稱各官占伊前項村寨田地以致百姓逃竄差發拖欠節緣係侵擾外夷地方事理若不拏問處置誠恐失夷人心因而激變引惹邊釁不無勞師費財為中國憂所係甚

大非但區區田土而已查得尹指揮係尹泉陳指揮係  
陳輔明指揮係明廣尹千戶係尹銘蘭千戶係蘭鑑俱  
騰衝司鮑千戶係鮑鑰金齒司知事謝慶係土官合無  
將各官與百夫長刁克蠻等拘提到官坐委雲南都布  
按三司堂上公正官各一員押帶前去告田處所從公  
踏勘如所告是實即將田地斷給刁克蠻管領招撫逃  
民復業耕種辦納差發有罪之人問擬如律若有虛詐  
亦當宣布恩威諭以禍福使之知所警懼不敢違犯干

礙太監錢能另行奏請定奪如此則彊禦畏法而詞訟自息遠人安業而邊釁不生緣數內尹泉等係軍職謝慶等係土官未敢擅便具題

請勅貴州會兵撫捕羅雄州賊人奏狀

准兵部咨職方清吏司案呈奉本部送兵科抄出巡按雲南監察御史林符題據雲南都布按三司經歷司呈各承奉本司劄付照會各准本司副使等官董俊等咨關據六涼衛指揮郭宏呈稱曲靖軍民府羅雄州土官

知州者甫等先被營長阿昌等殺害地方告蒙總兵官  
征南將軍黔國公沐琮鎮守雲南太監錢能案驗仰都  
布按三司轉行分巡分守都指揮僉事方明左叅議桂  
茂之副使董俊會案牌仰宏等帶領官軍并土官副使  
資安原差把事楊景山等帶領民兵於本年五月十二  
日分路前往阿得村把隘聽調是宏不知鄉道有者甫  
男者格自帶官奴人等引至地名小房邊忽被阿昌統  
領本寨并貴州黃草壩馬步夷兵三千餘徒各執長鎗

勁弩挨牌等器至十三日午時分就與民兵抵敵殺死  
阿鎖等二十人砍傷四十餘人彼時民兵發狠亦將賊  
人阿末等殺死射傷一十餘人被阿昌將者格虜去不  
放是宏等官軍見得勢大不敢抵敵阿昌又同營長阿  
南等分據各寨令賊把截路口欲要裝伏迎敵官軍等  
因又據亦佐縣土官縣丞海祿呈稱阿昌隱其兇惡情  
犯推稱土官者甫與適索有故爭田因和者格前來抄  
擄本營村寨三司就便統兵前來怎奈我不肯將者

格與職領回及平夷衛指揮李忠呈稱帶領官軍會同亦佐縣典史凌常大等管領民兵到於黃草壩那革河口累被適習差人把路實難前去等因又據土官者甫把事楊景山走回民兵奈道等各呈告前因到職為照先蒙總兵鎮守等官案驗俱為前事已經差委曲靖府同知等官丁賢等前去本州撫拘阿昌等諭以朝廷恩威禍福照依土俗與者甫盟誓講和被其因親結搆黃草壩強盜阿束等入境擒殺聞知上司親臨撫諭又敢



助兵據寨不服出官今據郭宏等各呈前來委的克犯  
阿昌等設計招引不相統攝之人抗拒官軍敵殺民兵  
況各賊勢大分據山險急難撲勦若不早圖長策處置  
停當誠恐結構日深釀成禍患不便等因移關到司查  
得先蒙巡按雲南監察御史董韜案驗奉都察院巡按  
雲南七百四十八號勘合割付及總兵官征南將軍黔  
國公沐琮准右軍都督府雲字七百二號勘合咨俱為  
積年聚衆殺虜地方等事據羅雄州土官知州者甫等

奏稱成化七年月日不等被營長阿周南那保同妻適  
索等朋聚本管夷兵各借倩貴州黃草壩營長阿冊等  
兵馬二千餘人各披執衣甲鎗刀弓弩張打旗號將本  
州阿貴塊冊等殺死營長民人周通等二十餘人內將  
阿本阿久等分屍號令生擒男婦二百餘口燒毀房屋  
三百餘間仍抄搶牛馬家財奪占者甫莊田一十七處  
聲言若不順從起兵俱要殺盡等情奏行刑部看係邊  
夷抄詞備行雲南鎮守總兵巡按等官轉行都布按三

司分巡分守官員撫出者甫與邵保審係爭論田莊照  
依土俗講和回報訖續為朋聚燒毀村寨支解人命等  
事據里老火頭張小等告稱本州土官者甫使令家奴  
阿索討租彼適索同奸夫阿昌等主使民兵阿額等窺  
伺各人經過射斫六人登時殺死六人告蒙布按二司  
委官詣彼撫諭及被糾聚貴州黃草壩已故營長阿冊  
妻適習兵馬二千餘人將者甫原住村寨圍住內殺死  
把事李沙海等分屍支解有土官寅夜走脫及據本州

矣恐等村被害民人阿達等各告朋聚民兵殺虜人財攪害地方等事成化十一年月日不等被適索阿昌阿南等結聚黃草壩適習并阿昌妻弟營長阿東等統領民兵將父者寧等殺死抄搶家財等情告蒙呈達總兵官征南將軍黔國公沐琮鎮守雲南太監錢能巡按雲南監察御史林符備行三司分巡分守都指揮僉事方明叅議桂茂之僉事翁遂撫捕間各官又據本州千夫長適定營長小阿乖等告稱阿昌等連年謀害土官奪

占各村田莊殺虜人民不得安業要乞調軍勦捕等因  
備呈總兵鎮守等官行仰三司分巡分守官員量調官  
軍民兵前去相機捕解仍行貴州鎮守總兵巡撫巡按  
等官坐委三司副使等官劉本等行委普安衛州指揮  
等官蔣經等前去黃草壩撫治適習等不許出境幫助  
阿昌等攪亂地方訖豈其適習係阿昌親妹結構年久  
不肯改悔添兵屯聚阿昌住寨處所仍要讐殺又該分  
巡分守副使等官董俊等呈伏覩成化十一年十一月

初八日詔書內一款節開湖廣貴州等處苗蠻多因所  
司失於撫字及因貧窘所迫不得已相聚為盜詔書到  
日許令改過自新各歸本土安生樂業若不悔改仍前  
聚集為非並聽總兵等官征勦欽此照得阿昌連年借  
引貴州黃草壩苗賊越境殺人為非不肯改悔例該征  
勦呈蒙總兵鎮守等官案行各官量調官軍民兵前去  
羅雄州酌量彼中夷情事勢緩急若果各犯仍前為非  
即照詔書內事理勦捕去後今該前因擬合通行合行

割付照會本司即便轉呈施行等因到院臣看得雄州已故營長那保妻適索先與土官者甫爭奪田莊互相搆怨阿昌因與適索有姦幫助積年讎殺又糾營長阿南等見據木黑等寨山箐險阻去處不聽招撫其地與貴州黃草壩接境止隔一江其黃草壩有扒者等三十八寨俱係已故大營長阿冊統屬人馬威強其部內營長阿東等俱各夷兵衆多兇惡勢大先年阿昌因與者甫有讎將伊妹適習與阿冊其阿東又係阿昌妻弟以

此軟血誓盟結黨構兵應援阿昌招之即來揮之則退  
又各以貴州所屬夷人與雲南官司不相統攝肆無忌  
憚致將土官者甫趕逐在外不敢回州所管民人財畜  
被其殺虜數多又被放火燒毀村寨強占田莊被者甫  
節次奏告行委三司分巡分守官員親詣撫諭輒敢仍  
招賊黨擁兵據寨不服拘喚及官軍壓境又敢拒敵殺  
死民兵搶去者甫之子者格不肯放回及照賊犯阿東  
適習等既蒙貴州總兵巡撫等官行委三司官員撫諭



不許越境生事乃敢玩法益兵愈加猖獗幫助阿昌等  
為惡似此強夷法所難容今副使等官董俊等呈乞早  
圖長策處治一節臣以為除患必先治其黨欲討羅雄  
州之賊不先治黃草壩賊黨彼將相援負固必不從化  
誠恐日後貽患地方非輕除案行都布按三司轉行分  
巡分守官員親詣羅雄州將賊犯阿昌等設法撫捕外  
如蒙乞勅該部計議合無請勅貴州鎮守總兵巡撫等  
官嚴督彼處分巡分守官員親詣黃草壩將夷賊適習

阿索等撫回本土各安生業今後不許越境助阿昌等爲惡如是適習等黨惡不悛仍前領兵前來攪擾地方就便量調貴州官軍會合雲南官軍夾攻並勦各將適習阿東阿昌等通行擒捕解官處以重刑如此則諸夷知所警懼一方可保無虞等因具題成化十三年十二月初七日通政使司官於奉天門奏奉聖旨該部知道欽此欽遵抄出送司查得成化六年十月十七日該雲南曲靖軍民府羅雄州土官知州者甫奏稱被本州法

干寨營長阿周同男那保及革宗者等村營長阿昌阿南等并貴州黃草壩營長阿折等助兵朋聚殺虜人畜燒毀房屋乞要調兵擒捕等因本部爲照係一面夷情查無各該鎮守總兵等官具奏緣由已經議行總兵鎮守巡按三司設法撫勘去後未報今該前因案呈到部叅照雲南曲靖軍民府羅雄州土官知州者甫被營長阿昌挾讎結黨構引貴州黃草壩賊衆將者甫趕逐在外殺虜人財燒毀村寨等情係是土官夷人爭奪田莊

互相攻擊先該兵部及刑部奏行都察院備行雲南鎮  
守巡按三司官撫勘去後其委官都指揮叅議副使等  
官方明桂茂之董俊自合體量夷情多方設法擒其首  
惡散其餘黨使不至於日動干戈延及良善今却妄引  
詔書比照湖廣貴州見奉勅書征勦苗蠻事例輒便動  
調官軍前進追勦致被夷僮將原領鄉道知州者甫男  
者格捉去不肯送出又將官軍原領民兵阿鎖等二十  
餘人殺死似此輕率寡謀處置失當本當究治但礙夷

羅事情不係腹裏軍務況且止是巡按御史林符具奏  
不見總兵太監三司同奏中間事恐未明合無行移雲  
南鎮守太監錢能總兵官黔國公沐琮巡撫左副都御  
史王并巡按監察御史都布按三司議委分巡分守等  
官親詣羅雄州先行密切體勘彼中賊勢如何若果退  
散責令土居諳曉夷情之人前去村寨撫出營長阿昌  
等到官曉諭朝廷恩威生死禍福照依夷俗體例俾令  
兩相和斛將原搶村寨田庄人畜逐一退出給主其間

果有人命重情量為處置應奏請者具奏裁處倘此賊  
執迷生拗梗化弗從應合調兵勦捕計議停當量調附  
近軍兵民快人等相機行事仍星馳差人奏報本部仍  
行貴州鎮守右少監韋鑄總兵官都指揮同知吳經巡  
撫右僉都御史宋欽會同巡按三司等官坐委分巡分  
守官員黃草壩撫拘頭目適習阿束等回還本土各安  
生業保守疆界不許似前幫助阿昌等為惡攪亂地方  
自取夷滅果能聽從撫化釋其已往之愆特示自新之

路倘稔惡不悛負固不服應該別項處置具實回奏定奪等因奏奉聖旨是欽此欽遵移咨到院會同總兵官征南將軍黔國公沐琮欽差鎮守雲南太監錢能巡按雲南監察御史甄希賢雲南都布按三司都指揮僉事方明左布政使俞鐸按察使劉鈺計議得賊首阿昌今已病故者格已被適索等謀死黃草壩賊人適習阿束等係是適索黨與各賊積年為惡攪亂地方殺死人命逼逐土官知州者甫躲避不敢回州管事再三委官撫

諭執迷不聽情犯深重本當勦捕但不知即今賊勢有  
無聚散行據都布按三司呈准都指揮僉事方明右叅  
議金禮僉事方進咨關准本司咨關抄蒙臣等案驗准  
兵部咨該巡按雲南監察御史林符題前事依蒙親詣  
羅雄州委據諳曉夷情六涼宜良衛所千戶張弼周義  
等呈依蒙各賊於成化十三年五月初七日帶同土居  
諳曉夷語通事張聚與本州吏目夏志能等到於適索  
原住補羅額寨撫出適索與家奴趙阿哥阿希哲張普



直等到職隨問阿昌者格下落推稱俱已身死各職據此當將榜文內原奉勘合備細緣由令通事張聚譯作夷語曉諭適索知道本婦回稱務要者甫分與庄田三十二處與我各管一方纔罷等語各職回州本月初十日仍帶張聚等前去撫諭有適索趙阿哥等說要帶領者甫管下營長家奴人等來寨講和十二日依從與指揮實俊等同帶營長小阿乖等前去地方黑西寨駐劄講和互相爭諭適索趙阿哥等糾集賊首阿羅忒阿南

阿惡阿歪南阿額阿俗阿冊阿京阿歹普等并阿昌原  
日借留貴州黃草壩伊妻弟小營長阿束等殺傷民兵  
三百餘人見其占種雲南地方夷民田土居住不回幫  
助適索為惡夷兵二千餘人身披衣甲手執鎗刀弓弩  
要與廝殺各人見其勢惡四散奔走職等亦就回州今  
思首惡阿昌已死適索前項人馬俱是家奴趙阿哥阿  
希哲張普茸等聚集恃衆擾害地方至十三日又蒙備  
榜差千戶郭景齋去撫諭趙阿哥等令其改過勸化適

索相與講和各人又哄郭千戶說你且回去明日同委官張千戶等再領各營長來講和各職依聽十五日復引營長小阿乖等到彼又被家奴趙阿哥等添聚強兵三千餘人各執器械執迷生拗不肯講和又要趕殺各職見其兇惡恐傷性命只得脫身回來委的勢衆實難撫化等因到職據此案照先為前事已將原奉勘合并案驗內事理二次備榜差委各官照依土俗體例講和去後今呈前因叅照趙阿哥阿希哲張普直等與貴州

夷兵阿東等俱係協助適索并已故阿昌殺傷民兵數  
多與捉虜土官知州者甫男者格謀害身死不見下落  
人數及查各賊原今卷內成化八年該按察司去任副  
使等官曹景等成化九年僉事張寬等成化十年都布  
按三司都指揮僉事等官方明等成化十一年左叅議  
桂茂之等成化十二年副使等官董俊等及今本職等  
通前撫諭六次愈加執拗結黨不服人犯若不呈稟移  
文貴州巡撫鎮守巡按三司照依見奉勘合事理早將

黃草壩占種雲南羅雄州夷民田地久住不回幫助適  
索等為惡強兵阿束等招撫回還又量調彼處附近軍  
兵與雲南軍兵將適索趙阿哥等夾攻殄滅誠恐各賊  
大肆猖獗釀成邊患深為未便等因回報到院臣會同  
總兵官征南將軍黔國公沐琮巡按雲南監察御史甄  
希賢雲南都布按三司都指揮僉事方明右叅議金禮  
副使陳騏計議得賊首適索等係土官知州者甫部內  
之人乃敢結構貴州黃草壩賊人適習阿束等節次擾

亂地方趕逐土官抗拒官軍敵殺民兵已嘗委官撫諭  
數次令其革心向化終不聽從又將者甫之子謀害身  
死今奉欽依又行委官撫諭令其兩相和解退還村寨  
豈期各賊愈加生拘仍不聽撫復聚強兵三千餘徒意  
欲趕殺委官其稔惡不悛如此之甚合當勦捕欲便量  
調附近官軍民兵人等進勦但係黃草壩賊首阿東等  
見今占住羅雄地方動輒幫助適索等為惡誠恐兵至  
其地其賊結黨愈衆據險以待我軍欲進不得欲退不

可不無誤事況不知近來貴州曾無委官撫拘適習阿東等有無聽從縱使從之亦不足信且如去年貴州委官已取適習阿東等不敢擅調兵馬幫助適索等過界為非結狀繳報外及至雲南進兵其適習阿東等又來幫助適索等敵殺官軍此縱使從之亦不足信之明驗也必須雲貴二處各調兵馬進壓其境振揚威武可撫則撫可勦則勦方可成功如蒙乞勅該部計議合無請勅貴州鎮守總兵巡撫等官量調彼處官軍到於黃草

壩臨近地方駐劄臣等雲南亦量調附近官軍民兵人等到於羅雄州臨近地方駐劄各人選差諳曉夷情之人前去撫諭如是撫拍適習阿束等到於軍前不致幫助適索等為惡其適索等若肯俯首聽撫即當振旅而還倘若各賊稔惡不悛仍前幫助適索等為惡就便會合刻期進兵擣其巢穴擒其渠魁散其餘黨以彰天討之公以除地方之患以正官民上下之分以為夷羅作亂之戒庶乎可矣緣係處置地方賊情事理未敢擅便




具題

改南京都御史叅贊機務謝恩疏

臣以都察院右都御史巡撫雲南成化十三年十一月十五日欽奉本年九月初二日勅諭改南京都察院不妨院事叅贊機務者臣竊惟叅贊機務重任也非剛正有為博洽多識深沉而能斷者何足以當之臣以迂拙庸材雖嘗誤蒙任使不過因人成事其餘前數者之善實無一焉今蒙聖恩授以此寄拜命之餘驚憂失次深

恐不稱以負聖明用人圖治之意欲便懇辭讓於能者  
然璽書既降理難封還臣雖愚敢不夙夜匪懈鞠躬盡  
瘁補報萬一除望闕謝恩前去到任外謹具奏聞



王端毅奏議卷三

# 欽定四庫全書

史部

王端毅奏議卷  
五四

詳校官侍講學士臣法式善

編修臣  
裴謙覆勘

總校官進士臣繆琪

校對官中書臣葉莢

謄錄監生臣鄒曾蔭

謄錄貢生臣李幽園

欽定四庫全書

王端毅奏議卷四

明 王恕 撰

前叅贊機務

回報守備太監黃賜到任奏狀

節該欽奉勅令太監黃賜與爾等一同守備凡事必須與之協和計議停當而行欽此欽遵本官已於成化十四年十二月十二日到任管事外謹具題知

覆議定襄伯乞增操江官軍奏狀

准兵部咨該南京前軍都督府掌府事定襄伯郭嵩題  
內開一件軍務事查得新江口永樂五年設立操江官  
軍一萬七千員名後將數內浙江二千一百四十七員  
名放回景泰年間又選去神機營習學銃手并大小教  
場浦子口操練官軍共一千二百四十一員名及運糧  
屯種并發遣貴州等衛共四千五百五十員名及事故  
不補一千二十員名查點見在官軍八千八百四十二  
員名軍士數少委的不敷調用乞勅南京守備內外官

員將原選去神機營習學銃手并直隸安慶滁宣州三衛官軍照數撥還江口操守便益等因行令臣等勘議前項官軍何年送在神機營習學銃手并直隸安慶宣滁三衛官軍何年因何事例放回原衛只今應否取回備禦事體有無相應勘議停當徑自回奏定奪等因備咨准此臣等會同南京守備太監安寧等勘議得景泰元年因設立神機營選撥前項操江官軍并所選大小教場官軍俱送本營習學銃手天順元年為因南京各

營官軍差調數多缺少操備該前守備內外官員奏准  
取調直隸安慶建陽滁州宣州鎮江五衛官軍共三千  
員名輪班前來南京分撥各營操備內建陽衛官軍五  
百員名分撥新江口操守成化十年該把總操江定西  
安侯蔣因操江官軍事故數多又奏撥鎮江衛官軍七  
百員名見今操江外其安慶宣滁三衛官軍原係先年  
分撥大小教場之數並無放回原衛至今輪班操練行  
之年久況大小教場神機營見操官軍數皆不多若又



改撥操江不無此重彼輕事體不均合無仍令前項三衛官軍照舊大小教場操練庶幾事不紛更營伍安妥緣係勘議停當徑自回奏定奪事理未敢擅便具題

南京長安右門外木廠內失火叅工部官奏狀

成化十四年二月初九日巳時分忽見長安右門外榜房後南京工部堆垛木料廠房失火臣等親詣木廠督令五城兵馬帶領地方火甲人等救護因風猛火熾誠恐延及守衛直房當將榜房八間拽倒令人搬救各項

木料用水澆潑息滅續據本部西安廠看守木料辦事  
官高儼呈報本日巳時分有班匠吳成等在於守宿蘆  
蓆房內煮飯食後不覺竈內有火一時失於仔細被風  
吹起火星燒燬各工拆卸還官并餘剩杉松條木竹片  
麻索松杉栢板軟篾水膠姜黃蘆蓆共三萬一千三百  
四十八根條段塊斤片及蘆蓆廠房二連小瓦房六間  
拽倒板榜房八間及救出見在杉松條木猫竹竹片共  
四千五十四根段片行間又據南京東城兵馬指揮司

亦呈前事臣等會同南京守備太監安寧等議得廠房  
係是堆積官物以致看廠辦事官縱容班匠在內煮飯  
因而失火燒毀官物俱合查究緣係燒毀廠房查提京  
官事理未敢擅便具題

太廟內樹木被風吹倒奏狀

准南京守備太監安寧等揭帖准南京神宮監印信揭  
帖開太廟前面樹木內有年久枯朽栢樹并冬青等樹  
為因連日陰雨地土濕爛根科欹斜於成化十四年八

月十八日夜被風雨驟急吹倒八株准此臣等會同南京守備太監安寧等并南京工部署部事郎中黃會恭詣本處相看是實緣係太廟處所吹倒樹株理宜選擇吉日起除如蒙准題乞勅該部轉行南京工部摘差匠作及臣等內外守備量撥官軍行令南京欽天監選擇良利日時起除修整便益為此具本謹題請旨

覆奏南京六科陳言弭災事奏狀

准本府咨准南京兵部咨呈准兵部咨准禮部咨禮科

抄出南京兵科等科給事中鄭宏等奏內一件防奸細  
備開內府各衙門軍民匠役人等數多又有借撥旗軍  
力士約有七千餘名俱由東安西安北安等門早晚出  
入縱橫自如多少不知其數雖有無藉之輩姦細之人  
詐冒出入竊窺他故者豈能知其姦弊等因該兵部議  
擬奉欽依內事理移咨南京兵部會同內外守備叅贊  
等官計議酌量處置照依各門官軍門簿事例置立精  
微出入門簿各一扇南京兵部用印鈐記送赴守備官

處取具內府各衙門上工人等花名填註分送各門守衛官軍收掌照名平明點入未晚點出不許錯亂逐日將點過出入數目開送守備官處查考務在關防嚴密事無紛擾等因准此臣等內外守備叅贊等官會同取勘內府各監局等衙門軍民匠役人等一萬四千餘名分豁各門進出名數置立簿籍附寫完備南京兵部用印鈐記已令各該守門內官公同守衛官員收掌朝暮點驗去後續據談昭張保兒董榮等連名告係南京內

府各監局上工人匠狀告各役常日進內上工天未大明俱到西安等門伺候開放點驗牌面進至該管衙門點卯已畢隨即赴工直至申末酉初歇作散匠搜檢放出派定工程日逐比較不敢遲延即今蒙令守衛官軍平明點進未晚點出每早到於各門挨次擺立逐一唱名點驗放進已末時分纔到監局點卯已過方得關食早飯用工未及二箇時辰又要伺候未晚點出只得收工赴門聽候仍前挨次逐一點驗直至更初方纔點畢

各匠數中多有城外住者不得出門路眠野宿風雨饑  
餓未免失所工不能辦又被責併實是人難行門隨據  
南京內織染局署局事司設監左少監溫善等呈開本  
局工程皆係節奉欽依織造上用供用各王用并賞賜  
預備等用各項段足及欽差送染刻限守取絹布并年  
例織造赴京文武品官照出等項數該五萬六千有餘  
皆是緊要工程及據南京內官監左少監楊忠等亦呈  
本監造作係是供應薦新進用各項器皿并欽取竹器



家火扇骨及裝盛應用箱櫃木桶等件每年依時起運赴京工難停緩又據南京兵仗局右副使李誠等呈稱本局成造軍器火器數多并前廠按季成造軍器共一萬九千七百餘件上庫收貯預備軍需匠作工程刻期完報各稱上工人匠出入門禁遵依舊制懸帶牌面照驗關防赴工散匠立定時刻造作限期逐時比較猶恐遲延今令守衛官軍點驗日至巳末纔方進入到作不久告要收工伺候晚點計其一日止得午未二時動作

較驗常日工程虧欠中半其實妨誤累罪不便等因又據西安等門守門奉御等官許敬等并守衛把總指揮杜敏等呈蒙發到精微簿籍將各衙門上工人匠平明點入未晚點出依奉挨次唱名逐一點檢每日自平明點至巳時方止自未時點至更初纔得事畢緣皇城門禁鎖閉遲晚恐難關防等因臣等會同南京守備太監安寧等議得內府各衙門上工人匠委的數多每日早晚點檢出入皆在皇城禁門裏外聚集喧嚷況各項造

作工程皆係緊要委的妨悞不便合無令上工人匠照舊懸帶牌面各門照驗出入不必早晚唱名點驗庶免稽悞工作除聽候外緣係便益事理未敢擅便謹題請旨

駁議聽選官王瓚建言江北五衛免赴京操奏狀准兵部咨禮科抄出吏部聽選官王瓚建言南京應天龍虎橫海和陽武德五衛俱在江北浦子口所有官軍除差撥屯種運糧守城操備外其餘分撥南京新江口

大小教場差操緣隔楊子大江人馬往來多遭滄溺切  
照浦子口僻居江北城市偏虛擬合用人固守要將江  
北應天等五衛原撥南京各營差操官軍放回本處浦  
子口守城操備庶免警急風波之患等因該禮部抄出  
合同各部都察院通政使司大理寺六科給事中等官會  
議奏奉欽依行移南京兵部轉行南京守備官勘議前  
項江北五衛官軍應否免撥過江操練徑自定奪回奏  
等因備咨准此臣等會同南京守備太監安寧等計議

照得江北應天等衛官軍自永樂年間起一向俱在江南操備續於景泰四年該應天衛經歷姜永奏稱本處城池無人操守奏准將南京見操應天等五衛官軍舍餘數內摘發一千員名委南京旗手衛指揮董貴管領提督在於江北浦子口教場操練守城外天順三年又該南京和陽衛百戶周忠建言江北應天等九衛官軍俱赴南京操備隔江往來風波艱苦各要將本衛官軍俱在江北操守等因奉行該前守備魏國公徐承宗等

議得朝廷根本之地操守係干重務馬軍惟當增益若將前項官軍輕易調動萬一有警卒難取用已經奏奉欽依將前項衛分官軍照舊存留南京各營操備今聽選官王瓚未知事體又要將應天等五衛官軍放回本處浦子口操備查得江北應天等九衛見在南京大小教場并神機營新江口操練官軍舍餘共二千餘員名及查南京各衛見操官軍舍餘中間亦有在於江北屯所居住而赴南京操練者又如直隸建陽等衛官軍前

來南京輪班操備俱各經過大江比之應天等衙門路  
程尤遠若令軍士各就近便操備則江南操軍愈見數  
少將何守備京城而爲居重馭輕之道況江北浦子口  
見有指揮崔珏在彼守禦各衛見在官軍舍餘亦足以  
守城操備合無將前項衛所官軍原調南京各營操備  
者仍令照舊操守保障京師實為良便緣奉欽依勘議  
定奪明白回奏事理未敢擅便謹題請旨

關過內府銅錢給賞日本國使臣事畢奏狀

節該欽奉勅臣等及南京戶部禮部今該給日本國正  
賓并物價銅錢一千六百五萬六千三百九十文勅至  
爾等會同太監安寧等轉行南京天財廣惠二庫照數  
關出公同差去官員明白給賞事畢之日爾等仍將關  
過銅錢數目明白奏報欽此欽遵臣等會同南京守備  
太監安寧等轉行南京戶部禮部及南京天財庫照數  
關出前項銅錢公同差來行人鄧庠給賞外各夷俱於  
成化十四年四月十一日起程去訖緣奉勅仍將關過



銅錢數目明白奏報事理今將給賞過銅錢數目開坐  
謹具題知

奏解詐僞犯人奏狀

據守江東等門指揮李隆等呈開成化十四年九月十  
六日盤獲男子一名金玉并紅油勅書笏黃布包袱等  
件呈送到官審據金玉供年五十六歲係河南懷慶府  
河內縣在城第一保民籍於正統八年正月初八日是  
玉不合私自淨身具告本縣起送赴京該通政使司奏

送司禮監將玉責打八十發南海子收充淨軍成化九年五月內轉發看守皇庄成化十三年七月內爲盜賣官田事被錦衣衛校尉姬剛首送刑部河南清吏司將玉問擬雜犯罪死發吉王府做工該燕山前衛批差軍餘王信等解送成化十四年正月內到府長史司收管着後本年七月內玉因窺見本司紅油描龍笛一箇及有本司據奉祀所典吏曹迪告行原籍蘇州府吳縣優免差役印信公文二紙玉不合偷取在手私將殘缺舊

大誥半本裝在勅書篋內又將王姓名寫在前項公文  
之後欲往蘇州圖取銀兩本年九月十六日經過南京  
又不合進入外城江東門被守門官軍跟至城裏三山  
門叫同本門官軍將王盤獲呈送前來據供得此臣等  
會同南京守備太監安寧等議得金玉所供前情未委  
虛的緣係擅入京城門禁中間恐有隱下別情今將本  
犯鎖鑰并印封原帶公文等件差舍人王淳管解赴京  
為此開坐謹題請旨

叅奏南京經紀私與番使織造違禁紵絲奏狀

據南京錦衣衛巡捕委官百戶蔡瑛呈據周璋首係南京錦衣衛鎮撫司戶籍成化十三年八月初三日暹羅國進貢使臣杜文斌等到於上新河灣泊有經紀韓源陳質等引領鄰人石聰錢鵬等合夥用禮俱赴番船交結賣過象牙蘇木銀共銀七百三十六兩回家又憑中人田寬會約在城機戶陳昇等家織造各樣大紅黃并八寶閃色抹絨花樣遍地金花幃幔各樣段匹共織一

百一十五疋後有中人田寬來與璋說石聰等領銀織造番使段疋緣由亦來邀璋前去番船成交比時有璋不合聽從到船憑田寬領銀五百三十一兩其石聰就行俵發機戶陳昂等定織各色違禁段疋有璋並無分文入已不期又於本年十一月初一日有安南使人裴山到於上新河有彼中人阮福因前成交來與石聰用言說其使要織各樣段疋可去成交有璋又不合與同石聰到於使臣船上承攬織金違禁紗羅段疋共三百

餘足俱各將象牙作銀交與機戶吳斌等寫立合同依樣織造待回交付內有各樣紙劄該銀三百六十七兩其石聰等因嗔璋在夥設計勒璋自立合同虛受倭人安息油料等香該價銀四十四兩六錢六分餘無分文銀兩與璋收領見有合同存照其石聰等因前懷恨有璋在夥却乃唆令暹羅使人杜文彬於原定織造數內勒璋自立合同領銀一百二十九兩分投開款另認織五彩抹絨幔邊二疋并蟒龍大紅段疋有璋止收見銀

二十九兩依從織段二疋內銀一百兩亦係石聰等要  
得侵謀銀兩肥已暗設奸計叱喝伴送番船官處拘璋  
到船威治勒寫收銀一百二十九兩供狀在官故令陷  
害今思若不狀首委被奸徒石聰等糾衆私結番船領  
銀織造玄黃宮花樣遍地金段疋事屬違例如蒙准首  
乞賜行提各犯石聰等到官追究私結番人偽織違禁  
段疋欺凌詭騙銀兩情由明正其罪庶免日後不致陷  
害負損身家性命無辜為此將原領番銀香貨并織違

禁段足數目并領象牙逐一開單粘連具狀首告到職  
隨差巡捕校尉張洪等押發首告人周璋作眼認拏男  
子十七名到職責據杜林即杜瓚供年二十八歲係福  
建汀州衛武平守禦千戶所軍餘成化十三年四月十  
六日是瓚告給本衛所文引將帶本錢置買鐵貨裝到  
贛州府河下遇見親人李德報說有你房伯杜文彬先  
年出外生理不見回家今在暹羅國差來進貢有廣東  
三司盤過揀下虛心不堪進貢蘇木一百五十捆并截



斷象牙四包付托與我裝載前往南京上新河等處發賣有瓚喜信將自己鐵貨一同裝載到於南京上新河投托經紀陳質韓源將蘇木一百五十捆共重一萬五百斤陸續共賣銀五百二十五兩截斷象牙四包共重三百一十斤賣銀一百二十四兩共銀六百四十九兩內將銀一十二兩與陳質等作用錢接收各散去訖是瓚一向在彼存住至本年八月初三日有房伯杜文彬進貢番船方到下關灣泊有李德引領瓚同到房伯船

上拜認說知祖宗名字鄉貫相同方纔識認見有先不知名後知是使臣坤祿羣謝提哪嗒二人辦事一人幹事一人護送一人大小通事二人千戶一人同房伯奈英必美亞即杜文彬有瓚同李德就將前項賣牙木銀兩交還伯杜文彬等收訖彼有房伯與瓚言說先於正統十三年間因支鹽買賣遭風飄流過海今在暹羅國封為岳坤等官今充為使臣差來進貢後瓚因患痢疾病症復回經紀家調治有李德在於房伯船上領到原

賣牙木銀一百六十兩同未獲識人石聰并今在官石  
彥璋前去機戶陳昇家定織各色段足後有李德患病  
不能動止本年十月內雇搭船隻回家去訖相托瓚在  
陳昇家催討原定段足又審據林壽供係南京錦衣衛  
鎮撫司鞍轡局分調軍匠林信戶內寄住餘丁成化十  
三年七月十三日有今在官本衛鎮撫司餘丁周璋到  
壽家秤銀二十七兩六錢與壽買青拱白錦紵絲二段  
紅拱白錦紵絲一段去訖又審據周玠供係南京錦衣

衛鎮撫司女戶籍成化十三年八月二十日有暹羅國使臣在於龍江關遞運所倒換船隻是珎同今在官應天府江寧縣民人唐廉錢鵬將禮同到使臣船上探問承認做段足比有使臣約內寫織段足手巾銀三百二十八兩九錢止將銀二百八十七兩五錢與珎等三人收訖散與各機房織造段足本年九月初四日是珎等到於今在官上元縣民人陳昇家寫立合同將銀六十兩與陳昇接收織造大紅閃綠紵絲八疋先收大紅閃

綠紵絲三疋與使臣收訖餘欠閃色紵絲五疋將鴨頭  
綠素紵絲三疋青紵絲二疋折與使臣收訖本月初六  
日玠等又到未獲本司餘丁何通家寫立合同將銀三  
十七兩五錢與何通收訖織造青紅綠各色織金紵絲  
女襖一十九件交與使臣收訖十一日玠等又到未獲  
南京留守右衛右所軍匠張義家寫立合同陸續將銀  
一十八兩與張義接收織造香草麒麟裏外嚮板雲手  
巾三十四條是玠先收手巾四條與使臣收訖又收手

巾一十四條見今在官餘欠手巾一十六條未與十三日玆等到與今在官本司餘丁虞文端家寫立合同將銀六十二兩二錢與文端接收織造織金間道紵絲二疋栴榔袋三箇是玆先收織金間道紵絲一疋栴榔袋二箇與使臣收訖餘欠栴榔袋一箇織金間道紵絲一疋在虞文端家機上因使臣欠銀九兩八錢未織是玆等當日又到上元縣民人陳榮家寫立合同將銀九十兩與陳榮收訖織造白閃紅紵絲十疋綠閃白紵絲十

二疋是玆先收陳榮各色紵絲十四疋交與使臣收訖  
餘有各色紵絲一十八疋因使臣欠銀三十一兩六錢  
未織本年十月十八日是玆等到於未獲上元縣民人  
王宣家寫立合同陸續將銀一十九兩八錢與王宣接  
收織藍紅花各色紵絲一十八段交與使臣收訖外得  
使臣用銀五兩六錢又審據虞文端供係南京錦衣衛  
鎮撫司軍匠虞景戶內餘丁成化十三年八月二十四  
日有本司餘丁周璋到於文端家定織間道抹絨紵絲

六足該銀五十四兩寫立合同陸續將銀二十三兩二錢七分與文端接收先織間道五色抹絨幔邊紵絲三足與周璋接收去訖又審據石彥璋供係應天府江寧縣民匠成化十三年八月二十四日有未獲福建汀州衛武平守禦千戶所餘丁李德前來引領彥璋同未獲兄石聰到於使臣船上有使臣先將銀六十兩付與李德接收同彥璋到於今在官本府上元縣民人陳昇家寫立合同與陳吁接收定織段足有李德後又將銀一



百兩同彥璋與陳昂接收織造遍地織金紵絲一十五  
疋閃色紵絲二十一疋是彥璋先討藍小毬門紵絲一  
疋天青遍地金串枝寶相花紵絲一疋官綠遍地織金  
寶相花紵絲一疋白遍地雙枝寶相花紵絲一疋青閃  
色雙枝寶相花紵絲二疋青閃白紵絲一疋白閃藍紵  
絲一疋是彥璋交與使臣收訖有陳昂將用錢銀三兩  
二錢與彥璋收接使用餘有陳昂欠合同內銀五十二  
兩織造未完在機柳黃小毬門紵絲一段青織金六蓮

花紵絲一疋礬紅遍地織金十八雲紵絲一段官綠閃  
紅紵絲一段在陳昂家今被事發捉獲彥璋同陳昂到  
官追取陳昂機上各色紵絲五段見在又審據阮福供  
係南京金吾左衛右千戶所役過老軍成化十三年十  
一月初六日有安南國行人裴準進貢帶有象牙在船  
到上新河灣泊是福同今在官南京留守右衛鎮撫帶  
管老軍塗安在彼買賣因與裴準答話語音相同認是  
鄉里比有本人言說我自己帶有象牙在船央福等為

中尋人定織段足是福聽允不合引領今在官上元縣  
民人王文到於裴準船上寫立合同與王文收接有裴  
準將象牙六担作銀二百七十兩織造各色羅絹共七  
十五疋王文聽允收合同是福當日同塗安等引領上  
元縣民人吳斌到於通事何循船上有何循寫立合同  
吳斌收訖何循將截斷象牙八担作銀三百二十兩定  
織各色紵絲共四十二疋吳斌聽允各回去訖當日是  
福到於江東門壩邊住人周敬王鐸家與各人說知上

新河安南國行人裴準有象牙與機戶王文吳斌家織造段足你將小船送與王文吳斌家與你們各人船錢王鐸等聽允比有周敬王鐸言說每牙一担與銀七錢我包裹嚴密不使門上官軍得知還你停當各允是福回家本年十二月初四日福又不合引領今在官上元縣民人王信陳榮到於裴準船上有本人寫立合同與王信接收有裴準將象牙四担作銀一百九十兩定織各色綾紬紵絲共四十三疋有王信陳榮聽允各人去

訖當日是福到於周敬家與本人說知裴準將象牙與  
機戶王信陳榮織造段足你將小船裝來放在你家寄  
放還你船錢周敬依允是福回家有陳榮等俱各不曾  
織造段足成化十四年正月初八日有王鐸等將截斷  
象牙八担送到吳斌家將銀五兩六錢與王鐸接收本  
月十一日有王鐸等又將象牙六担送到王文家本人  
將銀四兩二錢與王鐸接收本月二十六日致被周璋  
具狀首發隨差巡捕校尉捉拏王信杜瓚等之時有王

宣何通張義周敬王鐸田寬各人知覺逃躲未獲於陳  
畀名下追出織金柳黃小毬門紵絲一疋青織金六蓮  
花紵絲一段礬紅遍地織金十八雲紵絲一段礬紅織  
金拱線紵絲一段官綠閃紅紵絲一段并又於王文名  
下追出象牙六石共秤重五百三十六觔吳斌名下追  
出象牙八石共秤重七百二十八觔王信陳榮名下追  
出象牙四石共秤重三百八十七觔及周璋原首將銀  
一十八兩與虞文端織造間道五色抹絨幔邊紵絲二

足并安息香油六十五觔并首未獲石聰原與周璋曾  
背織金紗蟒龍樣一塊及陳昂等名下追出原立合同  
十一紙俱各見在今將各犯供詞并追出各色段足象  
牙等物理合連人具呈等因據此案照先據鴻臚寺署  
丞馬全呈有暹羅國差來副使坤祿羣謝提等赴京進  
貢回還該禮部奏准給批差全伴送副使坤祿羣謝提  
等二十五員名沿途備辦日用飲食到廣東布政司安  
排茶飯管待成化十四年正月十六日到於龍江關河

下灣泊聽候廩給本職案督不許夷人進城延住數日  
並無廩給本職催併廩給督令夷人起程隨有副使坤  
祿羣謝提等說稱亦無廩給比先彼經過有彼處住人  
周璋石彥璋錢鵬周珎唐廩吳節周實承攬交去與本  
國王織段足銀兩成造花素段足待我催討完足纔敢  
回國見王聽允到今緣無送還本職恐違欽限夷人在  
彼又係京城去處被周璋等淹留遲滯未便又行嚴督  
夷人起程亦據副使坤祿羣謝提等連名具狀告赴本



職等因今將暹羅副使坤祿羣謝提等告狀一紙合行  
前赴欽差南京守備成國公朱等處呈明行取夷人管  
送審問乞提周璋等追給夷人銀兩織造段疋數目發  
送本職給還夷人乞賜廩給關賞夷人本職伴送起程  
庶不有違欽限其周璋等原先係與夷人交易情由乞  
另定奪明望先行週給段疋伴送夷人起程庶為便益  
理合開呈施行有坤祿羣謝提奈英必美亞等狀告係  
暹羅國差來副使等職於成化十二年四月內蒙本國

王差來進貢亦因本國為無出產段足因中領到國王銀兩前來買辦回國應用亞等坐駕海船一隻在洋累遭風水至本年八月初二日飄到雷州地方將船打碎呈蒙雷州委官指揮顧雲通判劉鎮等官前來壞船處所體勘是實將方物打撈搬運錦囊千戶所起庫收頓督軍國亞等看守外至本年十二月二十一日蒙欽差鎮守廣東右少監韋眷并三司委官等官前來開盤將蘇木選退水浸虛心朽爛彎節破片不堪進用小木三

百五十餘担選退碎象牙俱有破裂痕損刀傷截斷不堪進用碎牙二十餘担彼時三司等官俱欲焚化亞等聞說帶領番衆二百餘人哀情苦告各帶衣幔被水漂失告乞買布度寒當有欽差右少監韋眷并三司委官會議相同委見夷人衣單受凍憐憫給還外亞等領回衆又思議原領國王銀兩買段其銀船碎失水慮回本國誠恐有累亞等自雇船隻裝至廣東遇見相識簡玉李德二人承攬每木一百觔價銀三兩五錢碎牙每一

百觔價銀六兩簡王承攬蘇木二百五十担碎牙十七担李德攬木一百零五担碎牙三百一十觔其銀約至南京發賣已了交還其價銀二人俱各還足亞等收買各色段足回陪國王免衆後累成化十三年八月內有龍江遞運所住人石彥璋周珍唐廉錢鵬吳節周璋周實等來亞等船內各立合同文字二家收執為照各包攬價銀替織各色綾段至十二月終交還於正月十六日回至龍江驛前周璋同男周實來亞船內攬去官絹

一百疋替染虎班綃又攬坤祿羣謝提官綃一十五疋  
綠段長衣一件代染白綿三觔攬戶周珍石彥璋等俱  
還各色段疋一半止有周璋父子寸絲無還心生謀意  
捏攀人衆抵搪圖騙國王財本若不狀告追取實被周璋  
父子負騙夷人財本非止一端反行告衆意要衆人代  
還亦且周璋非干已之事負騙銀兩反替夷人告衆羈  
遲時月番衆無食有違風迅不能回國恐失下年進貢  
罪累不便見奉聖旨沿途備辦日用飲食到今半月餘

日並無廩給口糧乞闕存活養命回國有此屈抑無伸  
開單來告等因行間今呈前因臣等會同南京守備太  
監安寧等叅看得周璋所首林壽等所供及使臣坤祿  
羣謝提等所告私通外國使臣交易番貨織造違禁紵  
絲負騙夷人財本及杜瓚供稱杜文彬即奈英必美亞  
係伊房伯先年出外生理不見回家今在暹羅國差來  
進貢等情俱係違法重事合當究問除行令原差伴送  
官署丞馬全暫留使臣坤祿羣謝提等在於龍江驛日

逐闕支廩給聽候及將見在人贓送南京刑部問理干礙使臣坤祿羣謝提等價銀織成未還違禁紵絲等件王文等名下追出安南行人裴準等原交織造紵絲等物象牙應否給與各使該部徑自奏請定奪外謹具題知

乞存留騎操馬匹奏狀

據大小教場神機營新江口馬隊把總都指揮僉事李虎等呈照得天順年間各營騎操馬匹常有一千匹存

留下營走陣差撥調用尚且不敷其後為存省京儲事  
該南京戶部奏准每年止存六百匹在城騎操餘皆下  
場牧放切緣存留騎操馬匹實是數少非惟走陣不成  
行列抑且不穀差撥應用即今下場牧放在邇呈乞多  
存馬匹在城差操便益等因據此臣等會同南京守備  
太監安寧等議得南京乃祖宗根本重地守備不可不  
嚴守備之道莫先於軍馬糧草京儲固不可不存省軍  
威尤不可不振揚近年存留在城騎操馬匹委的數少



不穀差操兼且即今京儲存省年久蓄積頗多如蒙乞  
勅該部計議合無將南京各營見在馬匹每遇下場之  
時存留一千匹在城騎操聽調照例支給草料喂養皆  
要下場牧放庶使軍威振舉而緩急不致於悞事矣緣  
係存留騎操馬匹動支草料事理未敢擅便具題

王端毅奏議卷四